


Ni Pangulong  
Thomas S. Monson



# Tampad sa Pagtuo sang Aton mga Katigulangan

**S**i John Linford nagaedad 43 sang sia kag ang iya asawa, nga si Maria, kag tatro sang ila mga bata nga lalaki ang nagdesisyon nga magbiya sang ila puluy-an sa Gravely, England, sa pagbiyahe sang linibo ka milya agud magbuyllog sa mga Santos sa nalupyakan sang Great Salt Lake. Ginbilin nila ang ila ikaapat nga anak nga lalaki, nga nagaalagad sa misyon, ginbaligya ang ila mga pagkabutang, kag nagkadto sa Liverpool sakay sa barkong *Thornton*.

Ang pagbiyahe sa dagat pakadto sa New York City, kag pagkatapos sa dalanon pakadto sa Iowa nangin ordinaryo. Ang mga kabudlayan nagsugod ugaling, sang wala madugayi nga ang mga Linford kag iban pa nga mga Santos sa Ulihing-mga-Adlaw nga naglayag sa *Thornton* naghelin sa siudad sang Iowa sang Hulyo 15, 1856, bilang kabahin sang wala-swerte nga James G. Willie handcart company.

Ang malain nga panahon kag ang mabudlay nga pagbiyahe nangin makatalagam para sa madamo sa guban, kalakip na kay John. Sang ulihi nagmasakit sia sing tuman kag nangin maluya nga ginkinahanglan sia nga ikarga sa karito. Sang pag-abot sang guban sa Wyoming, ang iya kundisyon labi nga naglala. Isa ka rescue team gikan sa Salt Lake City ang nag-abot sang Oktubre 21, pila lang gid ka oras nga nagtaliwan si John. Napatay sia temprano sina nga aga malapit sa pangpang sang suba sang Sweetwater.

Si John bala naghinulsol nga ginbaylo niya ang kasulhay kag kahapos para sa mga paghimud-os, mga

kawad-on, kag mga kabudlayan sang pagdala sa iya pamilya sa Sion?

“Wala, Maria,” siling niya sa iya asawa antes lang gid sia mapatay. “Nalipay ako nga nagkari kita. Indi na ako makalab-ot nga buhi sa Salt Lake, pero ikaw kag ang mga bata makaabot gid didto, kag wala ko ginahinulsolan ang tanan nga aton gin-agyan kon ang aton mga anak magadaku kag magpundar sang ila pamilya sa Sion.”<sup>1</sup>

Nakumpleto ni Maria kag sang iya mga anak ang ila pagbiyahe. Sang pagtaliwan ni Maria malapit 30 anyos pagkatapos sadto, sia kag si John nagbilin sang palanublion sang pagtuo, sang pag-alagad, sang katutom, kag sang pagsakripisyoo.

Ang mangin Santo sa Ulihing-mga-Adlaw amo ang mangin isa ka pionero kay ang kahulugan sang isa ka pionero amo ang “isa nga nagapanguna agud ihanda ukon buksan ang alagyan para sundon sang iban.”<sup>2</sup> Kag ang mangin pionero nagapangayo nga mangin anad sa pagsakripisyoo. Bisan pa nga ang mga miyembro sang Simbahani wala na sa karon ginahambalan nga magbiya sang ila mga puluy-an agud magbiyahe pakadto sa Sion, sa masami ginakinahanglan nila ibilin ang ila daan nga mga pamatasan, madugay na nga mga kostumbre, kag pinalongga nga mga abyans. Ang pila nagahimo sing mabudlay nga desisyon nga biyaan ang mga miyembro sang ila pamilya nga nagapamatok sa ila pagkamiyembro sa Simbahani. Ang mga Santos sa Ulihing-mga-Adlaw nagasulong,

pero, nagapangamuyo nga ang mga mahal sa kabuhi sa ulhi makahangop kag magbaton.

Ang alagyan sang isa ka pionero indi mahapos, pero nagasunod kita sa banas sang pinakadalayawon nga Pionero—nga amo ang Manluluwas—nga nag-una, agud ipakita sa aton ang alagyan nga dapat sundon.

“Kari, magsunod sa akon,”<sup>3</sup> pangagda Niya.

“Ako amo ang dalan, kag ang kamatuoran, kag ang kabuhi,”<sup>4</sup> pahayag Niya.

“Magkari kamo sa akon,”<sup>5</sup> panawagan Niya.

Ang alagyan mahimo nga mabudlay. Ang iban nabudlayan magbatas sang pangyaguta kag mga pang-insulto sang buang-buang nga mga tawo nga nagahikay sang pagkaputli [chastity], pagkatampad, kag pagkamatinumanon sa mga kasuguan sang Dios. Apang ang kalibutan wala gid man nagahatag importansa sa pagtuman sang mga prinsipy. Sang si Noe ginsugo nga maghimo sang arko, ang buang-buang nga mga tawo nagtangla sa masanag nga kalangitan kag dayon nangyaguta kag nag-uligayat—tubtob nga nagtupa ang ulan.

Sa kontinente sang America madamo nga mga siglo ang nagligad, ang mga tawo nagduda, nagbinaisay, kag naglalis tubtob nga ginlamon sang kalayo ang Zarahemla, gintabunan sang duta ang Moroni-hah, kag ginlapawan sang tubig ang Moroni. Ang pag-uligayat, pagyaguta, dinupak, kag sala wala na. Ginbuslan ang mga ini sang masubo nga kalinong, madamol nga kadulom. Ang pasensya sang Dios naubos, ang tion sang Iya plano nag-abot.

Si Maria Linford wala gid nagdula sang iya pagtuo sa pihak sang pagpanghingabut sa Ingglatera, mga kabudlayan sang pagbiyahe pakadto sa “lugar nga ginhanda . . . sang Dios,”<sup>6</sup> kag sang nagsunod nga mga pagtilaw nga iya ginbatas para sa iya pamilya kag sa Simbahan.

Sa isa ka seremonya sa kilid sang lulubngan nga ginpanahungod sa handurawan ni Maria sang 1937, si Elder George Albert Smith (1870–1951) nagpamangkot sa iya mga kaliwat: “Magmangin tampad bala kamo sa pagtuo sang inyo mga katigulangan? . . . Magtinguha gid nga mangin takos sa tanan nga mga sakripisyong [ila] ginhimo para sa inyo.” Bisan man kabahin kamo sang pionero nga kaliwat ukon una-nga-henerasyon nga miyembro sang Simbahan, nagasandig bala kamo sa mga ehemplong pagtuo para sa giya kag kabakod? Ari ang maayo nga paagi nga makasugod kamo:

1. Maghimo sang listahan sang mga tawo nga imo ginadayaw. Mahimo sila mangin miyembro sang imo kaugalingon nga pamilya (sang una ukon karon), mga abyans, mga lider sang Simbahan, ukon mga tawo sa balaan nga mga kasulatan.

2. Isulat ang mga kinaiya nila nga imo naluyagan. Ang imo bala iloy matuod nga pasensyoso? Ayhan ang

maagom ang mga bugay sang ginpanumbalik nga ebanghelyo, upod ang iya sini paglaum kag pangako paagi sa Pagpasag-uli [Atonement] ni Jesucristo.

#### MGA TANDA

1. Tan-awa sa Andrew D. Olsen, *The Price We Paid* (2006), 45–46, 136–37.
2. *The Compact Edition of the Oxford English Dictionary* (1971), “pioneer.”
3. Lucas 18:22.
4. Juan 14:6.
- 5 Juan 7:37; tan-awa man sa 3 Nefi 9:22.
- 6 “Come, Come, Ye Saints,” *Hymns*, no. 30.
- 7 Tan-awa sa Olsen, *The Price We Paid*, 203–4.

#### PAGTUDLO GIKAN SA SINING MENSAHE

Hunahunaa ang pagpangabay sa inyo mga gina-tudloan nga magpamensar sang mga tawo sa ila mga kabuhi nga nag-una kag nangin mga pionero para sa ila. Dayon pamangkuta sila kon san-o sila nagkinahanglan nga mangin mga pionero kag naghanda sang alagyan para sa iban. Agdaha sila sa pagbinagbinag sang mga tinion sang ginkinahanglan nila magsakripisyong kag kon ngaa nangin mapuslanon ini. Mahimo ninyo dayon sila hangkaton sa pagsulat sang ila panaksihon nahanungod sa “pinakadalayawon nga Pionero,” ang Manluluwas.

#### LAMHARON

#### Tampad sa Ila Pagtuo

**S**i Pangulong Monson nagasugid sang isa ka istoriya parte sa isa ka pionero nga pamilya kag dayon ginsambit niya si Pangulong George Albert Smith: “Magmangin tampad bala kamo sa pagtuo sang inyo mga katigulangan? . . . Magtinguha nga mangin takos sa tanan nga mga sakripisyong [ila] ginhimo para sa inyo.” Bisan man kabahin kamo sang pionero nga kaliwat ukon una-nga-henerasyon nga miyembro sang Simbahan, nagasandig bala kamo sa mga ehemplong pagtuo para sa giya kag kabakod? Ari ang maayo nga paagi nga makasugod kamo:

1. Maghimo sang listahan sang mga tawo nga imo ginadayaw. Mahimo sila mangin miyembro sang imo kaugalingon nga pamilya (sang una ukon karon), mga abyans, mga lider sang Simbahan, ukon mga tawo sa balaan nga mga kasulatan.

2. Isulat ang mga kinaiya nila nga imo naluyagan. Ang imo bala iloy matuod nga pasensyoso? Ayhan ang

imo abyán maayo sa iban. Ayhan nanamian ka sang kaisog ni Kapitan Moroni.

3. Magpili sang isa ka kinaiya gikan sa imo listahan kag pamangkuta ang imo kaugalingon, "Paano ko maangkon ini nga kinaiya? Ano ang dapat ko himuong agud matigayon ini sa akon kabuhi?

4. Isulat ang imo mga plano sa pagpatubo sining kinaiya kag ibutang ini sa lugar nga makita mo pirme, agud mapahanumdum ka sang imo lalab-utan. Magpangamuyo sa Amay nga Langitnon para sa bulig kag bantayan pirme ang inyo progreso. Sa tion nga mabat-yagan mo nga napatubo mo na sing husto ini nga kinaiya, mahimo ka magpili sang isa ka bag-o nga kinaiya nga hikuton.

Panumduma nga sa aton pagpatubo sang dalayawon nga mga kinaiya sa aton mga kaugalingon, indi lang naton ginapasidunggan ang pagtuo sang aton mga katigulangan kag ang mga sakripisyong ila ginhimo, kundi mahimo man kita mangin impluwensya para sa kaayuhan sa mga yara sa aton palibot.

## MGA KABATAAN

### Isa Ka Man ka Pionero!

**A**ng mga pionero mga tawo nga nagapanguna agud ihanda ukon buksan ang alagyan para sundon sang iban.

Magdrowing sang isa ka larawan ukon mangita sang litrato sang isa sang imo mga katigulangan. May nahibal-an ka bala nga isa ka istorya kon paano nila ginhanda ukon ginbuksan ang alagyan para sundon mo? Magsulat sang duha ka mga paagi nga mahimo ka mangin pionero sa karon. Mahimo mo ipaambit ang imo mga ideya sa masunod ninyo nga family home evening!



# Ang Aton Ikasarang sa Pagkaginikanan

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sang "Ang Pamilya: Isa ka Proklamasyon sa Kalibutan" makapadugang sang inyo pagtuo sa Dios kag magabugay sa ila nga inyo ginabantayan paagi sa visiting teaching? Para sa dugang nga impormasyon, maglog-on sa [reliefsociety.lds.org](http://reliefsociety.lds.org).

"Importante kaayo nga ang mga espiritu nga anak sang Dios matawo sa kalibutan kag makaangkon sang kahigayunan nga mag-uswag pakadto sa kabuhi nga wala'y katapusan," panudlo ni Elder Dallin H. Oaks sang Korum sang Napulo'g Duha ka mga Apostoles. "Tungod sang pinakamataas nga katuyuan sang dakong plano sang kaluwasan, nagapati ako nga ang pinakadaku nga manggad sa duta kag sa langit amo ang aton kabataan kag aton kaliwanan."<sup>1</sup>

Si Elder Neil L. Andersen sang Korum sang Napulo'g Duha ka mga Apostoles nagsiling:

"Nagapati kita sa mga pamilya, kag nagapati kita sa kabataan. . . .

". . . Ang Dios nagsiling kay [Adan kag Eval], Magmabungahon, kag magbuad, kag magtugub sang duta' [Genesis 1:28]. . . .

"Ining kasuguan wala malipatan ukon ginbale-wala sa Ang Simbahang ni Jesucristo sang mga Santos sa Ulihung mga Adlaw."<sup>2</sup>

Bisan pa nga indi tanan sa aton mangin mga ginikanan sa sini nga kabuhi, mahimo kita magsapupo sang kabataan bisan ano man ang ila edad. Nagaklipay kita sa mga bugay sang pagka-bahin sa

pamilya sang Amay nga Langitnon, kag nagaeksperiensya kita sang mga kalipay kag mga hangkat sang pagka-bahin sa isa ka dutan-on nga pamilya. Kag para sa kadam-an, ang pagkaginikanan nagahulat sa ila sa ginapaabot nga wala'y katapusan.

## Dugang nga Balaan nga mga Kasulatan

Mga Salmo 127:3; Mateo 18:3–5; 1 Nefi 7:1; Moses 5:2–3

## Mga Istorya Gikan sa Matuod-tuod nga Kabuhi

"Madamo nga mga tingog sa kalibutan sa karon ang nagabale-wala sang kaimportante sang pag-angkon sang mga kabataan ukon nagalaygay sa pag-atrasar ukon paglimita sang kabataan sa isa ka pamilya," siling ni Elder Andersen. "Ang akon mga bata nga babayi sang sini lang nagpabasa sa akon sang isa ka blog nga ginsulat sang isa ka Kristiyano nga iloy (nga indi sa aton simbahang) nga may lima ka kabataan. Nagkomentar sia: '[Sa aton pagdaku] sa sini nga kultura, mabudlay kaayo mag-angkon sang isa ka panan-aw sa pagkailoy base sa biblia. . . . Ang ranggo sang kabataan tuman ka nubo ikumparar sa

pag-eskwela sa kolehiyo. Sigurado nga mas manubo pa sangsa pagpanglugayawan. Mas manubo pa sangsa kahapos nga maggwa kon gab-i sa paglingaw-lingaw. Manubo pa sangsa pagpatahum sang imo lawas sa gym. Manubo pa sangsa bisan ano nga trabaho nga imo naangkon ukon ginalaman nga maangkon.' Dugang niya dayon: 'Ang pagkailoy indi kalingawan, isa ini ka bokasyon. Wala ka nagakolekta sang kabataan tungod nakita mo nga mas manami sila sangsa mga stamps. Indi ini isa ka butang nga imo himuong kon may tiempo ka. Amo ini ang rason nga ginhatagan ka sang Dios sang tiempo.'"<sup>3</sup>

## MGA TANDA

1. Dallin H. Oaks, "The Great Plan of Happiness," *Ensign*, Nob. 1993, 72, 75.

2. Neil L. Andersen, "Children," *Liahona*, Nob. 2011, 28.

3. Neil L. Andersen, "Children," 28.

## Binagbinaga Ini

Sa ano nga mga pamaagi nga ang aton dutan-on nga pamilya pareho sang aton langitnon nga pamilya?